

四庫全書

子部

欽定四庫全書

太平御覽卷三十三

宋 李昉等 撰

時序部十八

臘

臘附

臘

許慎說文曰臘冬至後三戌臘祭百神也

禮記月令曰孟冬是月也天子乃祈來年于天宗大割

祠于公社及門閭臘先祖五祀

此周禮所謂蜡祭也天宗日月星辰也割祠割

牲以祭也臘謂以畋獵所得禽祭之五祀門戶中雷井竈也或曰祈年或曰大祠或曰臘互文也勞農以

休息之

黨正屬民飲酒正齒位也

天子乃命將帥講武習射御角力

講武角力校武士材力所以備畋獵之禮

又郊特牲曰天子大蜡八伊耆氏始為蜡

伊耆氏古天子號也蜡

也者索也

謂求索也

歲十二月合聚萬物而索饗之也

歲十二月

周之正月謂建亥之月饗者祭其神也萬物育功于民者神使為之也祭之以報焉

又曰昔者仲尼與于蜡賓

蜡者索也歲十二月合聚萬物而索饗之亦祭宗廟孔子

嘗仕魯在助祭之中事畢出遊于觀之上喟然而嘆觀闕也孔子見魯君于祭

有不備于此又觀象魏仲尼之嘆蓋嘆魯也

又曰子貢觀于蜡蜡索也歲十二月索孔子曰賜也樂

乎對曰一國之人皆若狂賜未知其為樂也孔子曰百

日之勞一日之澤非爾所知也

周禮曰國祭蜡則吹豳頌擊土鼓以息老物鄭玄曰十

亥之月也索萬物而祭之者萬物天成歲事至此為其老而勞其禮以息之也豳風七月又有獲稻介壽稱觥萬壽無疆之事是詩歌其類矣謂之頌者以其言歲事功成也周以今之十一月為正月以今十月為臘月也

傳曰晉侯復假道于虞以伐虢宮之奇諫弗聽以其族

行曰虞不臘矣

臘祭名也日月會于龍尾百物備合國于是祭羣神也

史記曰秦惠文王十二年初臘始皇三十一年十二月

更名臘曰嘉平

太原真人茅盈內紀曰始皇三十一年九月庚子盈曾祖父濛乃於華山之中

來雲駕龍白日昇天先是其邑謠曰神仙得者茅初成駕龍上升入太清時下玄洲戲赤城繼世而往在我盈帝若學之臘嘉平始皇聞謠歌而問其故父老具對此仙人之謠勸帝求長生之術于是始皇欣然乃有尋仙之志因改臘月為嘉平也

漢書曰高祖十年春有司請令縣常以春二月及臘祠

稷以羊羶

又曰嚴延年為河南太守初延年母從東海來欲從延年臘到洛陽適見報囚

報行決也

母大驚便止都亭不肯入

府延年出至都亭謁母母閉閣不見延年免冠頓首閣下良久母乃見之因數責延年曰幸得備郡守專治千里不聞仁愛多刑殺人欲以立威豈為民父母意哉延年服罪重頓首謝自為母御歸府舍母畢正臘謂延年曰天道神明人不可獨殺我不意當老見壯子被刑戮

也行矣去汝東歸掃除墓地耳遂去歸郡後歲餘延年果敗

司馬彪續漢書曰季冬之月星迴歲終陰陽已交勞農夫享臘以送故焉

又舊儀曰臘者報諸鬼神古聖賢有功于民者皆享之又禮儀志先臘一日大儺謂之逐疫

袁山松後漢書韓卓字子助陳留人臘日奴竊食祭其

母卓儀其心即日免之

免從良也

謝承後漢書曰第五倫母老不能之官至臘日常悲戀
垂淚

又曰沛國陳咸為廷尉監王莽篡位還家杜門不出莽
改易漢法令及臘日咸常言我先祖何知王氏之臘乎
又東夷列傳曰三韓俗以臘日家家祭祀云臘鼓鳴春
草生也

東觀漢記曰甄字字長文北海人建武中自青州從事
徵拜博士每臘詔書賜博士羊人一頭羊有大小肥瘦

時博士祭酒議欲殺羊稱分其肉字曰不可又欲投鉤
字復恥之因先自取其最瘦者

高堂隆魏臺訪議曰詔問何以用未祖丑臘臣隆對曰
按月令孟冬十月臘先祖五祀謂薦田獵所得禽獸謂
之臘左傳曰虞不臘矣唯見此二者而皆不書日聞先
師說曰王者各以其行之盛祖以其終臘水始生於申
盛於子終於辰故水行之君以子祖辰臘火始生於寅
盛於午終於戌故火行之君以午祖戌臘木始生於亥

盛於卯終於未故木行之君以卯祖未臘金始生於巳
盛於酉終於丑故金行之君以酉祖丑臘土始生於未
盛於戌終於辰故土行之君以戌祖辰臘今魏據土德
宜以戌祖辰臘

又曰華歆常以臘日宴子弟王朗慕之蓋家由戶漸矣

杜公瞻云蜡者息民之祭故孔子曰百日之勞一日之
澤其所祭八神者皆報其成功則於十月農隙是也後
世臘有新故交接之義遂移於夏正月十二月晉博士
張亮說蜡聚享臘者祭廟初云蜡則黃服蜡臘不同物
必非也臘宜在新故交接二祭月同而名異祭俱而服
殊今推諸經傳無正說蜡臘之文目今云蜡臘此則同

日祭但殊名耳據田獵取獸之名為臘因索享百神號之曰蜡其日上祭先祖旁享百神下息萬民無別祭也即鄭玄云既蜡臘先祖五祀於夏是勞農者也近日蜡臘兼設蜡在十月臘在歲終隋開皇四年始停建元之蜡直為建丑之臘依五行水衰於戌而用戌日故也

晉書范喬字伯孫喬邑人臘夕盜斫其樹有告者喬佯不聞邑人愧而還喬曰節日取此欲與父母相歡娛耳何以愧乎遂與之

又曰陳軫問方士戴洋曰江南有富人顧彥先周宣佩是否洋曰顧不及臘周不及明年八月其年十二月廿

九日顧卒明日臘宣佩以明年七月晦亡

又晉起居注曰安帝安隆四年十二月辛丑臘祠作樂
又博士張亮議曰臘接也正宜在新故交接也俗謂之
臘明日為初歲秦漢以來有賀比古之遺語

晉宋舊事曰魏帝遜位祖以酉月臘以丑月魏名臣奏
曰大司農董遇議曰土行之君故宜以未祖以丑臘為
得盛終之節不可以戌祖癸臘

梁書曰何鳳為建安太守物不敢忤伏臘每放囚還家

依期而返

唐會要曰貞元九年十一月上曰比來京兆府每年及臘日府縣捕養狐兔以充進獻自今以後宜停

又曰貞元十一年十二月臘日畋于苑中止多殺行三驅禮軍士無不知感

鄭玄列傳曰玄方十二年隨母還家正臘讌會列十餘人皆美服盛飾語言閒道玄獨默然如不及母私督數乃曰此非吾志不在所願

列女傳曰魯之母師者魯九子之寡母也臘日休家作者召諸子謂曰婦人之義非有大故不出夫家然吾母家多幼稚歲時祀不理吾從汝謁謁告諸子欲往往監之慎房中之守吾夕而返于是天陰還太早至閭外而止待夕而入魯大夫從臺上見而恠之使問對曰妾朝出與諸婦孺子期夕而反妾恐其酹釀醉飽人情所有也妾反早故止閭外期盡而入大夫美之言於穆公公賜母尊號曰母師

搜神記曰宣帝時陰子方者當臘日晨炊而竈神形見子方再拜受慶家有黃羊因以祀之自是以後暴至巨富故後常以臘日祠竈

周處風土記曰歲前竭恭敬于明祀乃有藏彊臘日之後叟媪各隨其儕為藏彊分二曹以校勝負

荆楚歲時記曰又為藏彊之戲辛氏以為鈎弋夫人所起周處成公緩並作彊字藝經庾闡則作鈎字其事同也俗云戲令人生離有禁忌之家廢不修也

又曰孔子所為預以培賓一歲之中盛于此節

又曰俗又以此月為臘月按史記陳勝傳有臘日之言是謂此也諺云臘鼓鳴春草生村人並繫細腰鼓戴胡頭及作金剛力士以逐大疫

華陽國志曰王長文字德雋元康初守江源令縣收得盜馬賊及發塚賊長文引見誘慰時適臘晦皆遣歸家獄先有繫囚亦遣之謂曰教化不厚使汝等如此長吏之過也蜡節慶祚肆汝歸于家善相歡樂過節來還當

為汝思他理郡吏惶怖爭請不許尋有赦無不感恩

三十國春秋曰江州刺史李徹自武昌移疾被徵為右將軍而王舒未至猶在湓口後將軍郭默旋而過徹不禮之臘日遺默酒五觔豚一頭默大怒投之於江遂與故將張丑宋侯孟純等矯詔入城門莫有禦者徹獨與其妻寢默至斬于牀下及其司馬張滿參軍荀楷李慕傲默故也

王肅曰禮云季冬大雩旁磔出土牛以送寒氣乃即今

之臘除逐疫磔雞草絞桃梗之屬

風俗通曰夏曰清祀殷曰嘉平周曰大蜡漢曰臘臘者獵也因獵取獸以祭先祖或曰臘接也新故交接故有臘祭以報功也漢火行衰于戌故以戌為臘也

又曰菟鶩俗說臘正旦祖食得菟鶩者名之曰幸賞以寒酒幸善吉祥令人吉利也

鶩比恩切

又曰上古之時有神荼與鬱壘昆弟二人性能伏鬼每于山桃樹下簡閱百鬼鬼無道理妄為人禍者神荼與

鬱壘縛以葦索執以食虎于是縣官常以臘除文飾桃人垂葦焚畫虎於門皆追效前事冀以衛凶也

會稽符錄曰陳修字奉遷烏傷人家貧為吏常步擔上

下恒食乾糲音備每至正臘僵卧不起同僚以飲食請不

往其志操如此

世說曰王朗中年以識度推伏華歆歆蜡日常會集子姪宴飲王亦效之有人向張茂先稱此事張曰王之學華皆是形骸之好去之所以更遠

玉燭寶典曰臘者祭先祖蜡者報百神同日異祭者也
蔡邕獨斷曰臘者歲終大祭縱吏民宴飲非迎氣故但
送不迎也

崔寔四民月令曰十月上辛命典饋清麴釀冬酒以供
臘祀

又曰臘明日為小歲進酒尊長修刺賀君師
禮曰天子大蜡八

蔡邕王喬錄曰漢永和元年十二月臘夜王喬墓有哭

聲王伯聞而往視之天大雪見大鳥跡并祭祀處採薪者尹秀見人衣冠曰我王喬也汝莫取吾墓樹忽不見徐爰家儀曰蜡本施祭故不賀其明日為小歲賀稱初歲福始慶無不宜正旦賀稱元旦首慶百物惟新小歲之賀既非大慶禮止門內

西域諸國志曰天竺國以十二月十六日為臘臘則麥熟

盧公家範曰凡臘日上澡豆袋及頭膏面脂口脂

淮南萬畢術曰歲暮臘埋圓石于宅隅雜以桃核七枚則無鬼疫

養生要術云臘夜持斗卧井傍勿與人言投于井中除瘟疫

盛翁子藏鉤賦叙曰以臘之後因祭祀餘胙要命中外以行鉤為戲

嵇含蜡賦序曰大蜡之夕雖天下同有至攜金蘭以齊馨利得貴意以遺榮勢孰我尚哉

裴秀大蜡詩曰有肉如丘有酒如淵有穀如林有貨如山

臘

說文曰臘楚俗十二月祭飲食之神也

又曰析穀食新曰離臘

漢書曰武帝太初二年令天下酺五日臘五日祠門戶
比臘

續漢書禮儀志曰立秋之日郊禮畢始揚威武斬牲于
郊東門以薦陵廟其儀乘輿御戎輅白馬朱鬣躬執弩

射牲薦廟太宰令謁者各一人載獲車馳馬送廟還宮
使者齎束帛以賜武官肄兵習戰陣之儀斬牲之禮名
曰軀劉

風俗通曰謹按韓子書山居谷汲者媵臘而買水楚俗
常以十二月祭飲食也又曰嘗新始殺也食新曰軀媵
又曰謹按自郊軀媵春秋饗射天子射麇掩雉獻諸宗
廟扶陽發滯養老致敬化之至也

太平御覽卷三十三

欽定四庫全書

太平御覽卷三十四

宋 李昉等 撰

時序部十九

熱

寒

熱

釋名曰熱熱也如火之燒熱也或曰暑煮也如煮物也
說文曰溽濕暑也

易曰寒往則暑來

書曰哲時燠若

又曰僭恒暘若

詩曰誰能執熱逝不以濯

禮曰季夏之月土潤溽暑

鄭玄注曰
潤溽塗溫

又曰仲春行夏令則國乃大旱煖氣早來

又曰仲秋行夏令則其國火災寒熱不節

漢書曰蜀賓國武帝時剽漢使成帝時復遣使奉獻謝

罪杜欽說大將軍王鳳不令使使者遠向蜀賓國曰此
國道經大小頭痛之山赤土身熱之坂令人頭痛嘔吐
唐書曰代宗時有迎涼草鳳首木迎涼草幹如竹葉細
於杉乾枯而未嘗凋落盛暑而刺之牕戶間則涼風自
至

易稽覽圖曰夏至之後三十日極熱

京房易占候曰有雲大如車蓋十餘此陽火之氣必暑

有暍者

暍音
謁

禮斗威儀曰君喜怒無常時則常熱

五經通義曰冬至陽動于下推陰而上之故大寒於上
夏至陰動于下推陽而上之故大熱于上故易云日月
運行一寒一暑日在牽牛則寒在東井則暑牽牛外宿
遠人故寒東井內宿近人故溫也

白虎通曰夏至陰始起反大熱者何陰起陽氣推而上
故大熱也

又曰至人神矣入大澤不濡焚而不熱也

又曰暍者反凍于冷風

管子曰善為國者使農寒耕而熱耨

淮南子曰熱焦沙寒凝水

抱朴子曰洪從祖佛公每大醉及夏天盛熱輒入深淵之底一日許乃出以能閉氣胎息故耳

又曰或問不熱之道曰或服玄水丸或服飛霜散

霜一作雪

昔王仲都用此方也

桓子新論曰元帝被病廣求方士有漢中逸人王仲都

者詔問所能對曰但能忍寒暑耳因為待詔至夏大暑日使暴坐又環以十罏火不言熱而身汗不出

益州記曰瀘水即武侯渡處水有熱氣暑天不敢行

廣州志曰南方炎洲氣薰數萬里為瘴

又曰南方地暑熱交趾麥不成秀麻不生蕪菁無根括地圖曰天毒國最大暑熱夏草木皆乾死民善收水以避暑將暑常入寒泉之下

語林曰劉真長見王丞相時盛夏王公以腹熨彈碁局

曰乃淘

吳人以冷為淘
淘音虛饒切

劉既出人問見王公如何對曰

未見他異惟作吳語耳

山海經曰壽林之國夏有大暑不可以往

世說曰荀奉倩與婦至篤冬月婦病熱倩乃出中庭自取冷以身熨之

黃帝素問曰黃帝問岐伯曰人傷于寒而轉為熱何也曰夫寒盛則生熱也

楚招魂辭曰東方不可託些

些楚語
蘇資切

十日代出流金爍

石些

鏐銷也言東方有扶桑之木十日並在
其上言熱臨則金石至剛皆為銷鏐也彼皆習之

魂往必釋些

釋解也冤
往必解爛

宋鮑昭苦熱行曰赤坂橫西阻火山赫南威身熱頭且
痛烏墮魂來歸湯泉發雲潭焦烟起石珉日月有恒昏雨
霧未嘗晞丹蛇踰百尺玄蜂盈十圍含沙射流影吹蟲痛
行暉廓氣盡焦體蘭露夜沾衣飢猿莫一食晨禽不敢飛
毒瘴尚多死渡瀘寧免灾也病主驅蹈死地昌志登禍機
魏王粲大暑賦曰或赫熾以瘴炎或鬱術而燠蒸獸狼

望以倚喘鳥垂翼而弗翔根生苑而焦炙豈含血而能
當仰庭槐而嘯風風既生其如湯氣呼吸以祛暘汗雨
下而沾裳就清泉以自沃猶沃忍而不涼體煩如以於
悒心情悶而窘惶

又曹植大暑賦曰大暑赫其遂蒸元服華而尚黃蛇折
鱗於靈窟龍解角于皓蒼遂乃溫風赫曦草木垂榦山
拆海沸沙融爍爛飛魚躍渚潛龜浮岸鳥張翼以遠栖
獸交逝而雲散

晉傅咸感涼賦曰踐朱明之中月星鬱隆以肇興赫融融以彌熾乃沸海而焦陵

嵇含困熱賦序曰夫閏于夏則崇暑在冬則增寒永熙元年閏在仲夏三伏之節始奏商秋之辰未期於時下里貧生居室卑陋小巷不來清風短廡不足增蔭外困流汗內懷煩曠歎彼厦屋之士口饜珍味體逸高廊並天而寒暑殊同世而憂樂異

卞伯玉大暑賦曰體沸灼乎如燎汗流爛兮珠連

程曉詩曰平生三伏時道路無行車閉門避暑卧出入

不相過今世襪襪子

襪音柰
襪音戴

觸熱到人家主人聞客至

顰蹙

子六切

柰此何謂當行起去安坐止跣跨

跣音彭
跨音誇

所

說了無急踏吟一何多疲倦向之苦甫問居極那揺扇
臂中疼流汗正滂沱莫謂此小事亦是人一瑕傳戒諸
高明熱行宜見訶

晉傅玄詩曰朱朔運將極溽暑晝夜興裁動四支廢舉
身若山陵珠汗洽玉體呼吸氣鬱蒸塵垢自成泥素粉

隨手凝

魏曹植九詠曰温風翕兮煎沙石

翕熱貌也

鳥罔竄兮獸無

蹠蹠之石切天覆我也言天暖石焦地熱鳥無所逃獸無所蹈履也

寒

釋名曰寒捍也捍格也

說文曰霸寒也從雨執聲凜清寒也

霸丁念切

書曰休徵曰謀時寒若曰咎徵曰急恒寒若

孔安國曰君能謀則

時寒順之君行急則常寒順之

又曰冬祁寒小民亦惟曰怨咨

詩曰一之日颯發

風寒也

二之日栗烈

寒氣也

又曰北風刺虐也衛國並為威虐百姓不親莫不相攜

而去故云北風其涼雨雪其滂

北風寒涼之風也滂盛貌也箋云寒涼之風病

害萬物喻君政教酷暴民皆避亂而去

禮記曰天地嚴凝之氣始于西南而盛于西北此天地之義象也

又月令曰仲春行秋令則寒氣總至

又曰季冬之月命有司大儺旁磔出土牛以送寒氣

鄭玄

曰丑
為牛

又曰九月中氣是月也霜始降則百工休

謂膠漆
作停

乃命

有司曰寒氣總至人力不堪其皆入室

霜降清風戒寒
將以聚人入室

又曰孟冬行夏令則國多暴風

巽為風夏主巽風事
故行夏令則多暴風

方

冬不寒

夏氣干時
方冬而溫

蟄蟲復出

蟲以寒蟄
溫而復出

又曰大寒之月雞始乳鴈北鄉

又曰季春行冬令則寒氣時發草木皆肅

傳曰楚莊王圍蕭申公巫臣曰行人多寒王巡三軍拊而勉之三軍之士皆如挾纊

史記曰須賈見范雎曰今叔何事范雎曰臣為人傭賃須賈意哀之留與坐飲食曰范叔一寒如此哉乃取一綈袍賜之

漢書曰上聞韓王信降匈奴自將擊之連戰乘勝逐北至樓煩會天寒士卒墮指者十二三

又曰邴吉為廷尉時有老人年八十無子妻死娶後妻

生一子而翁老死其子年數歲有前妻女曰非我父之
肩遂上聞吉曰吾聞老人之子甚不耐寒日中無影遂
令驗之皆如其言

又曰晁錯上疏曰夫胡貉之地積陰之處也木皮三寸
土地寒故也冰厚六尺食肉而飲酪其人密裹鳥獸毳毛其

性能音寒寒

又曰王莽天鳳四年八月莽親之南郊鑄作威斗是日
大寒百官人馬有凍死者

又曰雲南郡點蒼山特寒四月五月中猶積雪皓然
謝承後漢書曰盛夏多寒常彪上疏諫曰臣聞政治之
本必順陰陽伏見立夏以來當暑而寒殆刑罰刻急郡
國不和時令之所致也

東觀漢書曰王郎起兵上自東南馳夜至蕪蕪亭時天
寒冽衆皆饑疲馮異上豆粥明旦上謂諸將曰昨得公

孫

馮異字
公孫

豆粥寒飢俱解

續漢書五行志曰獻帝初平四年六月寒風如冬時

又曰光和四年冬大寒北海東萊瑯琊井中冰厚尺餘
大有年

又窮谷之地固陰沍寒

趙書曰汲桑六月盛暑重裘累茵使人扇之患不清涼
斬扇者軍中謂之謠曰奴為將軍何可羞六月累茵披
貂裘不識寒暑斬人頭

易稽覽圖曰冬至之後三十日極寒

京房易占妖曰春夏寒政教急

又京房傳曰有德遭險茲謂逆命厥異寒

春秋運斗樞曰日行失則雖當暖而寒

春秋考異郵曰繆公即位仲夏大寒冰錯亂甚也

老子曰躁勝寒靜勝熱

文子曰婦人當年不織天下有受其寒者

尸子曰雨雪楚莊王披裘當戶曰我猶寒彼百姓賓客甚矣乃巡國中求百姓賓客之無居宿餼糧者賑之國人大悅

又曰朔方之寒冰厚六尺木皮三寸北極山有不釋之冰

晏子曰景公時雪三日公披狐白裘晏子入公曰怪哉雨雪三日不寒晏子曰古之賢君飽而知人飢煖而知人寒公曰善出裘發粟以與飢寒者

又曰景公起大臺歲寒役人凍死者有焉

管子曰大寒大暑大風大雨其至不時此謂四刑

淮南子曰北方有北極之山曰寒門

積寒所在故曰寒門

又曰夏蟲不可語冰

蝴蝶不
知寒雪

又曰青女

天神青
女玉女

仲春二月之夕乃閉其寒

呂氏春秋曰衛靈公天寒鑿池苑春曰天寒恐傷民公
曰寒哉春曰君衣狐裘坐熊席取火是故不寒民衣敝
不補君則不寒民則寒矣公曰善命罷後左右曰是德
必歸于春公曰不可春所有之善即寡人之善也衛人
悅當時衛公得君道矣

又曰冬之德寒

又曰見瓶水之冰而知天下之寒

國語曰火見而清風戒寒

火心星清風寒風也

清風至而修城郭

戰國策曰田單為齊相過淄水有老人涉淄而寒不能行單乃解裘衣與之襄王曰單之厚施欲取我國乎有貫珠者聞之曰不如因與焉已下令曰寡人憂民之寒單解衣與之稱寡人意於是閭里相與語曰單之愛人乃王之致也

周書時訓曰小寒之日鴈不北鄉民不懷王鵲不治巢

國家不寧雉不始雖國乃大水大寒之日雞不乳淫女
亂男鷲鳥不厲國不除兵水澤不堅言乃不從

說苑曰國有五寒而水凍不與焉一曰政外二曰女廣
三曰謀泄四曰不敬卿士而國敗五曰不能治內而務
外此五者一見惟禍無福

桓譚新論曰元帝時漢中有逸人王仲都能忍寒乃於
盛寒日令袒衣載以馵馬於昆明池上繞水而走御者厚
衣狐裘甚寒而仲都獨無變也

論衡說寒溫有曰人君喜則溫怒則寒

又曰河東項曼都好道學仙去家三年而返曰去時有數仙人將上天離月數里而上月之旁其寒淒淒

穆天子傳曰天子遊黃臺之丘日中大寒雨雪有凍死人天子作黃竹詩以愍之

葛仙公別傳曰公與客談語時天大寒仙公謂曰客居貧不能人人得爐火請作一大火共致煖氣何如因吐氣火赫然從口出須臾火滿屋客皆熱脫衣

孝子傳曰閔子騫事後母極孝騫衣以蘆花御車失鞞
父怒笞之撫背之衣單父乃去後妻騫啟父曰母在一
子寒母去三子單

石虎別傳曰十三年春二月虎率三公九卿躬耕籍田
又令夫人與命婦先蠶近郊是歲八月雨雪大寒行旅
凍死

鍾離意別傳曰嚴遵昔與光武俱為諸生暮夜宿息二
人寒不得寢卧更相謂曰後日豪貴憶此勿相忘別後

數年光武有天下徵遵不至也

西京雜記曰淮南王好方士皆以術見嘘吸為寒暑

劉向別錄曰燕有寒谷不生五穀鄒衍吹律以煖之乃生禾黍因名黍谷

廣志曰挹樓國地寒人多穴居也

又曰北方寒冰厚三尺地凍五尺人氣出口為凌馬首

常劍

洪範五行傳曰秦始皇九年四月寒凍民有死者

又曰聽不聰事不謀厥罰恒寒

晉朝雜事曰永寧二年十二月大寒凌破河橋

又曰大興四年大寒傷民冰厚時王敦肆亂殺戮忠良
神異經曰北方有層冰萬里厚百尺下有鼉在冰下土
泥中其形如鼠食水草肉重萬斤作脯食之已熟其毛
長八尺可以為褥卧之可以却寒

又曰東南方海中烜與遠切洲上有湖其中惟有鯽魚長

八尺食之宜暑而避風潯陽有林湖鯽魚大二尺
餘食之肥美可以已寒

黃帝素問曰地列為寒

太公金匱曰武王伐紂紂往洛邑天陰雨雪十餘日
漢張奐與延篤書曰太陰之紀冰厚三尺木皮三寸風
威寒冽損筋傷骨非老憊者所堪而復加之以師旅因
之以饑饉衆艱罄集不可一二言也

後漢張衡思立賦曰超區中之隘陋兮將北渡而宣遊
宣遍行積水之皚皚兮清泉汨而不流也汨凍寒風淒其永

至兮拂穹岫之騷騷兮武縮于殼中兮騰蛇蜿而自糾

龜與蛇交
曰玄武也

魚矜鱗而并凌兮

凌水也

鳥登木而失條

晉潘岳寡婦賦曰夜漫漫以悠悠兮寒淒淒以凜凜

魏應璩雜詩曰嵐山寒折骨面目盡生瘡

嵐山名
中山名

傳玄詩曰季冬時慘冽猛寒不可勝巖風截人耳素雪
隨地凝艸上飛霜起波中自生冰未夕結重衾崇朝不
敢興

又陸機樂府苦寒行曰北遊幽朔城涼野多險艱俯入
窮谷底仰陟高山巔凝冰結重澗積雪被長巖陰雲興

巖側悲風鳴樹端不覩白日景但聞寒鳥喧猛獸憑林

嘯玄猿臨岸歎

平聲

夕宿喬木下慘愴恒鮮歡渴飲堅冰

漿飢待零霜餐

又連珠曰沈寒凝海不能結風

琴操曰曾子嘗耕于泰山之下遭天雨雪寒凍旬日不得歸乃作憂思歌也

宋袁淑七言詠寒雪曰渚幽寒兮石烟聚日華收兮山氣深邊亭哀兮夜燧滅孤松振兮空岫吟魚戢鱗兮鳥

收翰虹螿火兮龍藏金

太平御覽卷三十四

欽定四庫全書

太平御覽卷三十五

宋 李昉等 撰

時序部二十

豐稔

凶荒

旱

豐稔

詩序曰華黍時和歲豐宜黍稷也

又曰我黍與我稷翼翼我倉既盈我庾維億

露積為庾十萬

億曰

又曰彼有不穫穉此有不斂穧彼有遺秉此有滯穗伊

寡婦之利

秉把也言收成豐稔彼有不及獲之穉禾此有不及斂之穧束彼有遺棄之把此有滯漏

之穗而寡婦取之為利也

又曰豐年秋冬報也

報者謂嘗也烝也

豐年多黍多稌亦有高

廩萬億及秬

數萬至萬曰億數億至億曰秬箋云豐年大有年也萬億及秬言穀多也

為酒

為醴烝畀祖妣以洽百禮降福孔皆

皆遍箋云烝進也畀與也

穀梁傳曰宣公十六年冬大有年五穀大熟

漢書曰宣帝即位用吏多賢百姓安土歲數豐穰穀每石數錢

漢記曰鮑德修志節有名績累官為南陽太守歲災惟南陽豐稔吏民愛悅號為神人

又曰建武二年秋天下野穀旅生麻菽尤盛或生瓜菜果實野蠶成繭被山民收其絮採穫穀果以為畜積

京房易妖占曰天雨穀歲大熟

尚書考靈曜曰春政不失五穀孳初夏政不失甘雨時

季夏政不失地無菑

菑謂土不稼穡

秋政不失人民昌冬政不

失少疾喪五政不失百穀稚熟日月光明

晚熟曰稚詩曰植稚菽麥

禮稽命徵曰天子祭天地宗廟六宗五岳得其宜則五

穀豐雷雨時至四夷貢物

禮斗威儀曰君乘木而王則草木豐茂嘉穀並生

春秋元命苞曰咸池主五穀其星五者各以其職以精

委為國也

宋均曰穀有五故五星主之

咸池之為言皆多也言穀生

于子水舍秀懷實至秋精垂故一名五車取載而歸之
之義也

孝經援神契曰歲星守心年穀豐

晏子春秋景公伐魯得東門無澤公問魯年穀對曰陰
冰厥陽冰厚五寸公問晏子晏子曰君問年穀答以冰
禮也陰冰厥陽冰厚五寸者寒溫節寒溫節則政平政
平則上下和上下和則年穀熟臣恐疲兵而無成君盍
盍何禮魯以息吾愁遂不伐魯
不也

汝南先賢傳曰袁安為楚相會楚王英事互相牽引拘繫者千餘安受命即叱馭而行既到決獄事應時理遣一旬之中延千人之命其時甘雨滂沛歲大豐稔

南越志曰高興縣有容雞其形如雞而五彩至則年穰臨海異物志曰獨春鳥聲有似春其鳴聲多者五穀傷鳴聲少者五穀熟

袁子正書曰語曰歲在辛酉乞漿得酒

梅陶書曰古人就食于安里今三州米流出門無如今

年豐也

廣雅曰年稔秋穀熟也

桓子新論曰世俗咸曰漢文帝躬儉約修道德以先天
下天下化之故致充實殷富澤加黎庶穀至石數十錢
上下饒羨

物理論曰正月朔四面黃氣其歲大豐此黃帝用事土
氣均和四方並熟

鹽鐵論曰周公時天下太平丘陵高下皆熟

山海經曰離魚見天下大穰

古歌詞曰長安城西雙員闕上有一雙銅雀宿一鳴五穀生再鳴五穀熟

凶荒

禮曰歲凶年穀不登君膳不祭肺馬不食粟馳道不除

祭事不懸大夫不食梁士飲酒不樂

皆為自損憂民禮殺生以祭先有虞

氏以首夏后氏以心殷人以肝周人以肺不祭肺則不殺生也天子食日少牢朔日太牢諸侯食日特牲朔日少牢除馳道為妨民取蔬食懸樂器鐘磬之屬也梁嘉食也不樂去琴瑟也

又曰凶年則乘駑馬祀以下牲

自貶損亦取易供也駑馬馬種最下者下牲少

牢若特豕特牲也

傳曰五年春無冰梓慎曰今茲宋其饑乎歲在星紀而

淫於玄枵以有時災陰不堪陽

時煥無冰也陰盛用事而溫無冰是陰不勝陽

地氣發泄也

蛇乘龍

蛇玄武之宿虛危之星龍歲星歲星木也為離龍星火次為蛇所乘

龍宋

鄭之星宋鄭必饑

又曰晉薦饑

麥米皆不熟也

使乞糴于秦秦伯謂百里奚曰與

之乎對曰天災流行國家代有救災恤鄰道也行道有

福不鄭之子豹在秦請伐晉秦伯曰其君實惡其民何
罪秦於是乎輸粟於晉自雍及絳相繼命之曰泛舟之
後後秦饑晉閉之糴

又曰宋公子鮑禮於國人宋饑竭其粟以貸之年自七
十以上無不饋遺也

穀梁傳曰一穀不熟謂之歉

歉食不足

二穀不熟謂之饑三

穀不熟謂之饑

爾雅曰穀不熟為饑蔬不熟為饑果不熟為荒仍饑為

薦

漢書曰高祖二年關中大饑米斛萬錢

又曰漢興接秦之弊諸侯並起民失作業而大饑僅米

石五十人相食死者過半高祖乃命民得鬻子就食蜀漢

又曰歲饑民貧卒食半菽

或曰半五升器名也臣瓚案士卒食蔬菜以菽雜半之

又曰元帝二年齊地饑米石二千餘

又曰王莽時睢陽以東米石二千莽遣二公將運關東

諸侯倉振貸窮乏又分遣大夫謁者救民煮木實為酪

服虔曰酪粥之屬

酪不可食重為煩擾流民入關者數千餘人

置養贍官以廩之盜發其廩民餓死者十七八

東觀漢記曰王莽末南方枯旱民多飢餓民于野澤掘

菟

水草實也

茨而食

又曰赤眉還入長安鄧禹與敵敗走至高陵戰士飢餓食藻菜帝乃徵禹還勅曰赤眉無穀自當來降吾折之

反捶笞之非諸將憂也

謝承後漢書曰趙典兄子溫遭歲大饑散家糧以賑窮

餓所活萬餘人

王隱晉書曰永嘉五年洛中大饑五月挈虞餓死

又曰劉琨與丞相牋曰夏則桑椹冬則莢音黃且視此哀

歎使人氣盡

晉中興書曰中原亂中宗初鎮江左假郟鑿龍驤將軍
兖州刺史鎮鄒山又徐龕石勒左右交侵百姓饑饉野
無生草時或掘野鼠螯燕而食之

又曰大興元年詔曰亢旱穀貴百姓嗷嗷有資者貴糴

貧羸之民益困漢世穀貴官賤糴使價不超越謂之平
準今雖無此可出邸閣米萬斛使三分減一以平其價
令貧困者悉得是以至秋也

吳志曰駱公緒年八歲與親客歸會稽事嫡母甚謹時
饑荒鄉里多困之公緒為之飲食衰少其姊仁愛有行
寡居無子見公緒甚哀之問其故緒曰士大夫糟糠不
足我亦何必獨飽姊聞之曰何不告我而自苦若此乃
自以私粟與公緒又以告母母亦賢之遂使分施由是

顯名

周書曰天有四殃水旱饑荒其至無時非積畜何以備之
夏歸藏曰士無兼年之食遇大饑妻子非其妻子也大
夫無兼年之食遇大饑與馬臣妾非其有也國無兼年
之食遇大饑百姓非其有也戒之哉

國語曰越大夫種謀曰今吳既罷罷音疲勞也而大荒薦饑

市無赤米米之惡也而困籠空虛圓者為困方者為籠其民必移就食

蒲羸于東海之濱蒲蒲子羸蚌蛤之屬也濱海涯

又曰魯饑臧文仲以玉磬如齊告糴

典畧曰從興平元年至建安二年其間四歲中咸陽蕭條亂賊李傕等始將部曲入長安居卓故塢中拔取酸

棗梨藿

藿從
弔切

以給食發塚取衣蓋形

崔鴻十六國春秋曰諸州自建武元年十一月不雨雪至十二年八月穀價踴貴金斤值米二升民流死者十有五六百姓嗷然人無生賴

又曰建元元年襄國大饑穀二升值銀一斤肉一斤值

銀一兩

朝子曰秦大饑應侯請發五苑果棗以活民王曰秦法賞有功誅有罪今發五苑是有功無功俱賞也

墨子曰百穀不收謂之旱二穀不收謂之凶四穀不收謂之餽音五穀不收謂之饑

淮南子曰畜者欲歲之荒饑

謂將計厚利

袁子正書問滑釐曰今當凶年有欲與子隋侯之珠者又有欲與子一鍾之粟者子將何擇釐曰吾取粟可以

救窮

河圖曰日月兩重暈者饑之象也

魏名臣奏曰太尉司馬懿奏云秋澇傷五穀又無菜薺四方饑饉有食桑皮者

英雄記曰李傕等相攻戰長安中盜賊不禁白日擄掠是時穀一斛五十萬豆麥二萬人相食啖白骨委積臭穢滿路

又曰幽州每歲不登人相食有蝗旱之災民人始知採

秬以棗椹為糧穀一石十萬錢公孫伯圭開置屯田稍

稍得自供給

秬音呂

又曰建安七年都中大饑米一斛二萬錢

博物志曰凶年暫辟穀法但食蠟半斤輒支十日不飢漢應豫立讚序曰王莽居攝以病告歸後赤眉賊眾來其所居城糧盡以私穀數千萬斛賑城中于時粟斛錢數萬無不稱其仁

晉王洽集曰洽臨吳郡上表曰編戶僵尸葬埋無主闔

門餓殍烟火不舉

旱

春秋考異郵曰旱之言悍也陽驕蹇所致也

詩曰旱既大甚滌滌山川

又曰旱魃為虐如惓如焚我心痺暑

痺疾也

憂心如熏

熏灼

也

又曰旱既大甚蘊隆蟲蟲

雷而非雨

書說命曰若歲大旱用汝作霖雨

又曰僭恒暘若

禮曰繆公召縣子問天久不雨吾欲暴尪而奚若曰天則不雨而暴人之疾子無乃不可與然則暴巫而奚若曰天則不雨而望之愚婦人於以求之無乃已踈與

周禮曰司巫掌羣巫之政令若國之大旱則率巫而舞雩

又曰女巫掌歲時祓除釁浴旱暵則舞雩

傳曰衛大旱甯莊子曰昔周饑克殷而年豐今邢方無

道天其或者欲使衛討邢乎從之師興而雨

又曰魯僖公三年自十月不雨至于五月不曰旱不為災也

又曰衛大旱卜有事於山川不吉

又曰僖公二十一年夏大旱公欲焚巫尪臧文仲曰非早備也修城郭貶食省用務穡儉也勸分此其務也巫尪

何為天欲殺之則如勿生若能為旱焚之滋甚公從之是歲饑而不害

又曰魯文公十年正月不雨至于七月

周正月今之十一月周七月今

之五

又曰魯宣公九年葬我小君敬嬴旱無麻始用葛第

第所

以引

又曰魯昭公十六年秋鄭大旱使屠擊有事于桑山

祭事

山也斬其木不雨子產曰有事于山蓺山林也而斬其木其罪大矣奪之官邑

漢書曰百里嵩字景山為徐州刺史時旱嵩行部傳車

所經即雨輒澍東海祝其合鄉三縣在山間嵩未往三縣獨不得雨父老請之入界即雨澍

又曰和帝永元六年秋旱時洛陽有寃囚帝錄囚理寃

未還宮雨澍

鄧太后事同

續漢書曰郡國旱公卿行雩禮求雨閉諸陽門衣皂衣興土龍立土人舞童二佾七日一度

又曰郡國俾各掃除社稷公卿官長以次行雩禮求雨也

魏志曰衛玠見黥面者其妻子後為官僮玠曰使天下不雨者蓋由此也

晉書曰督運令史淳于伯刑于連康市百姓喧嘩咸曰寃于是大旱三年

京氏易曰人君無惠澤于下則小旱

管子曰春不收枯骨朽皆伐枯木而去之則夏旱至矣
尸子曰湯之救旱也乘素車白馬著布衣身嬰白茅為
牲禱於桑林之野此時弦歌鼓舞者禁之

孟子曰七八月之間旱則苗槁矣

槁枯也

晏子春秋曰齊景公時旱欲祀靈山及河伯晏子曰夫山以石為身以草木為毛髮今久不雨毛髮將焦身且熱豈山不欲雨乎祀之何益君宜避殿暴露以索雨也公從之出野果大雨

世說曰湯時大旱七年雒川竭煎沙爍石乃使持三鼎祀山川祝詞曰政不節邪民失職邪宮室崇邪女謁盛邪苞直行邪讒夫昌邪何不雨之甚

洪範五行傳曰魯宣十年秋大旱時公興師伐邾取繹夫伐國亢陽益師旅百姓所不欲也應是大旱

益都耆舊傳曰趙瑤為漢中令大旱瑤請雨於靈星應時降雨

搜神記曰周暢為河南尹元初二年大旱暢乃葬路旁露骸為立義塚應時注雨

又曰諒輔字洪儒新都人為郡五官掾時大旱太守自暴中庭而雨不降輔自誓曰日中雨不降請以身塞無

狀

無狀謂所
祈雨不降

乃積薪柴自焚至日中時大雨一都沾潤

神農求雨書曰春夏雨日而不雨甲乙不雨命為青龍
又為火龍東方小童舞之凡如此而不雨潛處闔南門
置水其外開北門取人骨埋之如此而不雨命巫祝而
暴之不雨禱山神積薪擊鼓而焚之

瑞應圖曰遇旱責躬引咎理察冤枉退去貪殘側修惠
政則降以靈雨如其有道術禱祀山川致龍轉石閉陽
從陰之類誠非瑞應是以魯侯有暴尪之請齊景公以

祠山見譏

董仲舒曰春旱求雨令縣邑以水日令民禱社家人祀
戶無伐名木無斬山林曝巫聚瓦八日於邑東門外為
四通之壇方八尺植蒼繒八其神共工祭以魚八夏求
雨亦以水日家人祀竈無舉土功更浚水井曝釜甑杵
臼七日為四通壇于邑南門外方七尺植赤繒七其神
蚩尤祭以赤雄雞七凡求雨之大體丈夫欲藏匿女子
欲和而樂

師曠占旱曰歲欲旱旱草先生旱草者蒺藜也

山海經曰大華之山削成四方有蛇名肥遺六足四翼

見則天下大旱

湯時也

東荒之北隅有山名土丘應龍處

南極殺蚩尤與夸父不得復上故下數旱旱而作龍應

之乃得大雨

上無作雨者故也

又曰奚昆之山有人衣青衣名曰黃帝女妖

音魁

蚩尤代

黃帝請風伯雨師帝乃下天女曰妖雨止遂殺蚩尤妖

不得復上所居不雨

又曰鱒魚雞山黑水出焉彘尾出則天下大旱東荒之
北隅有焉

太平御覽卷三十五

欽定四庫全書

太平御覽卷三十六

宋 李昉等 撰

地部一

地上

地上

釋名曰地底也言其底下載萬物也亦言諦也五土所生莫不審諦也亦謂之坤坤順乾也

說文曰元氣初分重濁為地萬物所出列也

易曰坤元亨利牝馬之貞

馬在下而居者也而必牝者順之至也至順而後乃亨

又曰至哉坤元萬物資生乃順承天坤厚載物德合無

疆含弘光大品物咸亨牝馬地類行地無疆象曰地勢

坤

地形不順其勢順也

君子以厚德載物文言曰坤至柔而動也

剛至靜而德方後得主而有常含萬物而化光坤道其

順乎承天而時行

又曰夫玄黃者天地之雜也天玄而地黃

又曰立地之道曰柔與剛

又曰坤地也故稱乎母

陸績注曰
取含養也

又曰本乎地者親下

又曰在地成形

鄭玄注云形謂草木鳥獸
王廣注云形謂山川等

禮記曰人道敏政地道敏樹

鄭玄注云樹
謂植草木

又曰今夫地一撮土之多及其廣厚載華嶽而不重振

河海而不洩萬物載焉

此言地之博厚本由撮土山之
廣大本由拳石水之不測皆由

一勺皆合少成多自小
致大至誠者亦如此乎

又曰地載物天垂象取財於地取法於天是以尊天而親地

又曰博厚所以載物也高明所以覆物也博厚配地高明配天

又曰成子高謂慶遺曰生益於人死不害於人我死則擇不食之地而葬我焉

又曰燔柴於泰壇祭天也瘞埋於泰折祭地也

又曰天地不合萬物不生

又曰子夏曰三王之德參於天地敢問何如斯可謂參
天地矣孔子曰奉三無私以勞天下子夏曰敢問何謂
三無私子曰天無私覆地無私載日月無私照

又曰凡四海之內斷長補短方三千里為田八十萬億

一萬億畝

九州之
大計之

方百里者為田九十億畝山陵林麓

川澤溝瀆城郭宮室塗巷三分去一其餘六十億畝

周禮曰土訓掌道地圖以詔地事

道說也說地圖九州
形勢山川所宜告王

以施其
事也

又曰以天產作陰德以中禮防之以地產作陽德以和樂防之以禮樂合天地之化百物之產

又曰大司徒掌天下土地之圖周知九州之地域廣輪

之數

東西為廣
南北為輪

辨五地之物生一曰山林其動物宜毛

物其植物宜阜物二曰川澤動物宜鱗物植物宜膏物

三曰丘陵動物宜羽物植物宜藪物四曰墳衍動物宜

介物植物宜莢物五曰原隰動物宜羸物植物宜藪物

爾雅曰東至泰遠西至邠國南至濮鉉北至祝栗謂之

四極孤竹北戶西王母日下謂之四荒九夷八狄七戎
六蠻謂之四海距齊州以南戴日為丹穴北戴斗極為

空桐東至日所出為太平西至日所入為太蒙

郭璞注云極四

方極遠國也孤竹在北北戶在南西王母在西日下在東皆四方遐荒之地次四極者九夷在東八狄在北七

戎在西六蠻在南次四荒者距去也齊中也

尚書考靈曜曰地有四遊冬至地上北而西三萬里夏至地下南而東復三萬里春秋則其中矣地恒動不止人不知譬如人在大舟中閉牖而坐舟行不覺也

詩含神霧曰天地相去億五萬里

春秋感精符曰冬至成天文夏至成地理

春秋元命苞曰神農世怪義生白皐

怪義白皐之母名也

圖地形

脉道

白皐為神農圖畫地形通水脉之道使不擁塞也

又曰土無位而道在故太一不興化人主不任部地出雲起雨以合從天下勤勞出於地功歸於主

又曰地所以右轉者氣濁精少含陰而起遲故轉迎天

佐其道

地生於離既而不敢當陽動退居少陰則亦宜右行而迎陽者受其施育而成陽故曰佐其道

也

又曰地不足東南陰右動終而入靈門

地不足東南故立子午以相明

之子午者陰陽之衆所見處也故以二辰迴轉所不同以為門也右動動而東也靈門巳也陰藏於巳也

又曰地者易也言養物懷任交易變化含吐應節故其

立字土力於乙者為地

地加上以力又加乙者言奉天一也

春秋說題辭曰地之為言婉也承天行其義也居以下

山為位道之經也山陵之大非地不制含功以牧生

春秋內事曰地有三分王侯之所居也

孝經援神契曰地順受澤謙虛開張

開張九竅受流灑潤是其謙虛也

又曰計校九州之別土壤山陵之大川澤所注萊沛所生鳥獸所聚凡九百一十萬八千二十四頃磽埆不墾者千五百萬二千頃

家語曰子夏曰商聞山書曰地東西為緯南北為經山為積德川為積刑高者為生下者為死丘陵為牡川谷為牝蚌蛤龜珠與月盈虛是故堅土之人剛弱土之人肥虛土之人妙實土之人細息土之人美磽土之人醜

史記曰顓頊養材以任地載時以象天

漢書曰天道貴信地道貴貞不信不貞萬物不生

又曰秦地於天官東井輿鬼之分野周地柳七星張之
分野鄭地角亢氐之分野趙地昴畢之分野燕地尾箕
之分野齊地虛危之分野魯地奎婁之分野宋地房心
之分野衛地營室東壁之分野楚地翼軫之分野吳地
斗牛之分野

晉書曰裴秀禹貢九州地域圖論曰圖書之設由來尚

矣自古垂象立制而賴其用三代置其官國史掌其職
暨漢祖入咸陽丞相蕭何盡收秦之圖籍今秘書既無
古之地圖又無蕭何所得秦之圖籍惟有漢氏輿地及
括地諸雜圖各不設分率又不考正准望亦不備載名
山大川其所載列雖有麤形皆不精審不可依據或稱
外荒迂誕之言不合事實於義無取今制地圖之體有
六一曰分率所以辨廣輪之度也二曰准望所以正彼
此之體也三曰道里所以定所由之數也四曰高下五

曰方雅六曰遷道此六者各因地而制以校夷險之數
也有圖象而無分率則無以審遠近之差有分率而無
准望雖得之於一隅必也失之於佗方有准望而無道
里則施於山海絕隔之地不能以相通有道里而無高
下方雅絕斜迂直之校則徑路之數必無遠近之實相
違失准望之正矣故必以此六者叅而考之然後遠近
之實定於高下方雅迂直之筭故雖有峻山巨海之隔
絕域殊方之迥登降詭曲之回皆可得舉而定者准望

之法既正則曲直遠近無所隱其形

抱朴子云太極初構清濁始分故天先成而地後定

河圖括地象曰八極之廣東西二億三萬三千里南北
二億三萬一千五百里夏禹所治四海內地東西二萬
八千里南北二萬六千里

又曰天有五行地有五岳天有七星地有七表天有四
維地有四瀆天有八氣地有八風天有九道地有九州
又曰崑崙山為柱氣上通天崑崙者地之中也下有八

柱柱廣十萬里有三千六百軸互相牽制名山大川孔穴相通

又曰地廣東西二萬八千南北二萬六千有君長之州有九阻中土之文德及而不治

河圖挺佐輔曰百世之後地高天下不風不雨不寒不暑民復食土皆知其母不知其父如此千歲之後而天可倚杵勺勺隆隆莫知始終

河圖曰元氣無形勺勺隆隆偃者為地伏者為天

黃帝素問曰積陰為地故地者濁陰也

洪範五行傳曰地者成萬物者也

周髀算經曰天不可階而升地不可尺寸而度

楚辭曰地方九則何以墳之

王逸注曰墳分也謂九州之地凡九品禹何以能分

別之也

康迴馮怒地何以東南傾

康迴共工也昔共工與顓頊爭為帝怒而觸不

周山天柱折地維絕故傾也見淮南天道之篇也

鹽鐵論曰古者制地足以養民民以承其上千乘之國

百里之地公侯伯子男各欲其欲秦兼萬國之地有四

海之富而意不贍者嗜欲多而下不堪其求也

太玄經曰天以不見為玄地以不形為玄人以心腹為
玄天奧鬱化西北精也地奧黃泉隱魄縈也人奧思慮
含至精也

又曰九地一為沙泥二澤澆三沮崖四下田五中田六
上田七下山八中山九上山

蔡邕月令章句曰總丘陵原隰阪險曰地
范子計然曰夫地有五土之宜各有高下

鄭玄注孝經曰分別五土視其高下若高田宜黍稷下田宜稻麥丘陵阪險宜種桑粟

揚泉物理論曰凡居地有大利而無小害者上地也

山海經曰帝令豎亥步自東極至於西極五億十選

璞郭

注曰豎亥健行人選萬物也

九千八百八步豎亥左手抱算右手指

青丘北

又曰天地之東西二萬八千里南北二萬六千里出水者八千里受水者八千里

物理論曰地者底也底之言著也陰體下著也其神曰
祗祗成也育生萬物備成也其卦為坤其德曰母地形
有高下氣有剛柔物有巨細味有甘苦鎮之以五岳積
之以丘陵播之以四瀆流之以四川蓋氣自然之體也
地發黃泉周伏迴轉以生萬物地天之根本也形西北
高而東南下東西長南北短其盡四海者也

又曰地者其卦曰坤其德曰母其神曰祗亦曰媪大而
名之曰黃地祗小而名之曰神州亦名后土

黃地祗舉
八極之內

地神州王畿方千里內地神也后
土社也社地主也所在皆得言之

詩推度災曰上清下濁號曰天地

博物志曰地祇之位起形於崑崙從廣萬里高萬一千
里神物之所生聖人仙人之所集崑崙之東北地轉下
三千六百里有八玄幽都方二十餘萬里下有四柱柱
廣十萬里又有三千六百軸互相牽制也

又曰地以名山為之輔佐石為之骨川為之脉草木為
其毛土為其肉三尺以上為糞三尺以下為地重陰之

性也

又曰中國之域左濱海右通流沙方而言之萬五千里
面二千五百里東至蓬萊山西至隴右後號薊北前及
衡岳若計共四萬有三億之餘朝鮮岷山東治可西也
隴川以南及北海之國此是堯舜土及萬里湯時七千
里此後亦無常隨德優劣也

論衡曰地戶在東南

又曰地之最下者有揚兗二州洪水之時此二土最被

水害

又曰山川陵谷謂之地理

又曰地性生草山性生木

白虎通曰地者元氣生萬物之祖也地之言施也諦也應施變化審諦不誤敬始重終故謂之地也

老子曰地得一以寧地無以寧將恐發

莊子曰天地非不廣且大也人所容足耳

又曰海水三歲一周流波相薄故地動

列子曰共工與顓頊爭為帝怒而觸不周之山天柱折地維絕地不滿東南故百川歸焉

又曰地積塊耳充塞四虛無處無塊

文子曰地承天故定寧地定寧萬物形地廣厚萬物聚定寧無不載廣厚無不容

又曰地方而無涯故莫能窺其門

管子曰地或維之地莫之維地亡必矣

又曰地者政之本也是知地可以正政也地不均平和調則政

不可正也

桓公問管子曰地數可得聞乎曰東西二萬八千里南
北二萬六千里出水者八千里受水者八千里出銅山
四百六十七出鐵山三千六百九十處封禪之王七十
二家

墨子曰禽子問天與地孰仁墨子曰翟以地為仁民衣
焉食焉死焉家焉終不責德焉故翟以地為仁

淮南子曰禹使大章步自東極至於西極二億三萬三

千五百七十里使豎亥步自北極至於南極二億三萬三千五百七十里

又曰重濁者淹滯而為地

又曰天有九部八紀地有九州八柱九州之外有八埏東方曰少海東南方曰沅澤南方曰浩澤西南方曰丹澤西方曰泉澤西北方曰海澤北方曰寒澤東北方曰無通澤

又曰扶桑之上衆帝所自上下日中無景呼而無響蓋

天地之中也弱水在東建木在西木有十日其華照地

九州之大純

純緣邊也

方千里九州之外乃有八寅

一曰八寅

澤

亦方千里自東北方曰大澤

以漸加曰澤也

曰無通東方曰

大渚曰少海東南曰具區曰沅澤南方曰大夢曰浩澤

西南方曰注資曰丹澤西方曰九歐曰泉澤西北方曰

大夏曰海澤北方曰大冥曰寒澤凡八寅八澤之雲是

雨九州八寅之外乃有八絃

絃維也

亦方千里自東北東

曰和丘曰荒土東方曰棘林曰桑野東南方曰大窮

曰衆女

民少男多女也

南方曰都廣曰反戶

在日之南為北嚮戶

西南方

曰焦僥曰炎土

焦僥人長三尺衣冠帶紉

西方曰金丘曰沃野

金丘金所

出也

西北方曰一目曰沙所

其人一目

北方曰積氷曰委羽

積氷

至寒也委羽山名委羽之北蓋不見日也

凡八絃之氣是出寒暑以合八正

必以風雨八絃之外乃有八極自東北方曰方土之山

曰蒼門東方曰東極之山曰開明之門東南方曰波母

之山曰陽門南方曰南極之山曰暑門西南方曰南極

編駒之山曰白門西方曰西極之山曰閭闔之門西北

方曰不周之山曰幽都之門北方曰北極之山曰寒門
凡八極之雲是雲天下八門之風是節寒暑八絃八寅
八澤之雲以雨九州是和中土東方之美者有醫無閭

之珣玕琪焉

醫無閭東夷之山也珣玕琪玉名也

東南方之美者有會稽

之竹箭焉南方之美者有梁山之犀象焉西南方之美
者有華山之金石焉西方之美者有霍山之珠玉焉西


北方之美者有崑崙之璆琳琅玕焉

璆琳琅玕珠名也

北方之

美者有幽都之筋角焉東北方之美者有徒格山之文

皮馬
文皮虎豹
文皮也



太平御覽卷三十六